

ÉPESO

Paoro Iokanatsopatakiti Épeso Auakanimoni

1 ¹Nota, Paoro. Niökatsopataria aätsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi säkire auiãkanimoni, ipaniãtakiti kamakanimoni niokanatsopata. ²Aïri Teoso, Apiananiri Xesosi Kristo pakini sikari ikinipoko erekari hïtemoni. Ninoa kamaerekaxiniretai hïte.

Teoso Mereëua Itixi Kamiko Apisapanika

³Masãpiretari Teoso, aãuïte Xesosi Kristo iri: “Erekapitikai,” kotxi itakapekari ikinika erekari ate äkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴Itakari ikara erekari ate äkixiniremoni, kotxi itixi kamiko apisapanika Teoso mereëpekaua Kristo nakitiakori aniniua. Imereëua Teoso nireëkitinoka akamini ïkapani, maerekati amakamakani ïkapani, atiraõkiuatini ïkapani. ⁵Itixi kamiko apisapanika, Teoso mereëua iua anaakori aniniua ïkapani. Xesosi Kristo ipïpe ate ïkapani, ininiã iua txïkitakaua Teoso anaakori aniniua. Teoso txïkitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekari ipotxitakiti ikamini tïkane.

⁶Teoso txïkitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tiretakiti nakitiakori atxaua.

⁷Xesosi iikitxitari amaerekani, kotxi iarêka xiketa ate ïkapani, ininiã Teoso maxinïkaretari amaerekani. Uatxa ïmisiritaikaua amaerekani xika. Teoso kamari ikara ate ïkapani, kotxi ikinipoko erekari isika atemoni. ïixipoka ikara erekari Teoso sikakiti. Ikinipoko erekari aua iuamoni. ⁸Kãkiti kona posotari iaõtiniri erekari Teoso sikakiti ate maerekati kamakanimoni. ïKaiãotikori. Ikinipoko imaroretxi aua iuamoni. Atão inakaranoka imarota ikamini, ininiã ikara erekari ikaminiãua. ⁹Mitxi ïaimarotari Teoso inireêkiti ikamini tïkane. Uatxa ikamaimaroretãua. Ipotxitari oerekiniua inireêkiti. Peerekari iua potxitakiti. Ækixinireê ixinikari ikara ikamini. ¹⁰Teoso ketotini õti manapi, ikinipoko iposope inakasaaki, iua apotiitariko ikinimane itixine auakani, itixiã auakani pakini.

¹¹Xesosi Kristo nakitiakori atxaua, ininiã aãpakapari ate ïkapani inïkatakiti. Itixi kamiko apisapanika ixinikari ikamakiti ate ïkapani. Ikamari ikinika inirekakiti iaõka. ¹²Iua mereëua ate, merepitipanika Kristo sãkire auiãkaniua, ikinimane asãpiretini ïkapani: “Peerekari Teoso. Erekapitikari ikamakiti.”

¹³Hïtepekana auikari Xesosi sãkire, atão inakari hïkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai himaerekani makatxakiko. Xesosi sãkire hãuikasaaki, Erekari Matamatakoti apoka hãkixinireê. Iua Teoso takaõtxikare itxaua. Iua oerekai hïte Teoso nakitiakori hininiua. Xesosi sikaenetapekari Erekari Matamatakoti atemoni iokanatini. ¹⁴Isikaenetakiti Erekari Matamatakoti atemoni auape, ininiã aimarotapitikari aãpakapiniri ikinika isikaenetakiti, inïkatakiti ate ïkapani. Iuasaaki Xesosi apakapaua ate iua nakitiakori, iua iamotakini, kotxi imaktxakapekari amaerekani. Ikara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hïtoretini nikenakopiretakasaaki, ¹⁶nimisãkiretapikari Teoso hïte ïkapani. Nitxari iua: “Erekapitikai, kotxi pite makatxakari ninoa Épeso sitatxiti auakani maerekani,” nitxa. ¹⁷Teoso, aãuïte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hïte ïkapani ia atoko: “Pisikaimaroretana ninoa Ækixinire. Ninirekari Erekari Matamatakoti oerekinina pite iteene imarotinina ïkapani.

¹⁸Piopinikariko ninoa ākixinire atāo inakari imarotinina ĩkapani. Pite akiritana ninoa ĩkinipoko erekari apakapinina ĩkapani. Ikara poerekana ninoa imarotininina ĩkapani, iātapinirina ĩkapani. Pikamaimaroretana ninoa pite nĩkatakiti pite nakitiakori ĩkapani. Ikara pinĩkatakiti, pisikaenetakiti, peerekari. Itori pinĩkatakiti. !Ixipoka pinĩkatakiti. !Kaiāotikori pinĩkatakiti pinakitiakori ĩkapani. ¹⁹Pikamaimaroretana ninoa kaposotiire pinini. Ininiā piposotari iteene pisikaposotiiretiniaua ate pisākire auĩākani. Ikara piposotiire !auari ātimoni. Pataparari pite posotiire.” Ia atoko nimisākiretari Teoso hĩte ĩkapani.

²⁰Ikara Teoso posotiire ōkitikari Kristo ipĩkani sauaki auakasaaki. Iposo atoko iposotiireē itakari Kristo apiari topākiniātaā, ikikomoni itixineē. ²¹Ininiā Kristo Apiananiri itxaua. Iua posotiire apiata. Maerekani matamatakoni auĩteakori posotiire poiāoka. ĩkorapokoriti auĩtetxiakori posotiire poiāoka. Kristo posotiire apiata. ĩkorasaaki Kristo Apiananiri. Apaka katana Kristo atoko inakari !auari. !Auari āti kaposotiireri Kristo atoko. Kristo apiata. ²²Teoso txĩkitakari Kristo ĩkinimane auĩte ininiua. Itakari ĩkinimane imokaiakariakori ĩkiti patapi, ininiā Xesosi paniātakitinoka ikamana. Imokaiakari !auaika. Ininiā ĩkinipoko Teoso kamakiti auĩte itxaua Kristo. Teoso sikari iua isākire auĩākani auĩte ininiua. Inakitiakori kii atoko itxa Xesosi. ²³Iua ĩto atoko itxa inakitiakori, ininiā ĩkinimane inakitiakori sauaki iua aua. Itxĩkitakari ĩkinipoko atāo inini.

Mitxi Ipĩkani Atoko Atxaua

2 ¹Hĩtepekana, Xesosi txĩkitapekari hĩxinire auāki inini. Mitxi, isākire hāuikini apisapanika, ipĩkani atoko itxa hākixinire, Teoso manirekakiniti hĩkamini xika, himaerekani xika. ²Iuasaaki hĩte kamari ikini sereti maerekati, ĩkorapokoriti auakani maerekani atokokana. Iuasaaki hĩkĩpitari Satanasi sākire, maerekani matamatakoni auĩte sākire. Iua, initiriakorikata aua ĩtima auiniātaā. Iua parĩkauata Teoso sākire makĩpitakani xinire āki. ³Mitxipeka amakinika ate Teoso sākire makĩpitakani atxaua, kotxi akamari maerekati aĩto paniātakiti. Iuasaaki akamari maerekati aĩto nireĕkiti. Akamari maerekati axinikakiti iaōka iuasaaki. ĩkinimane itixi auakani atoko, ate, apanakini apaka maerekati kamakani atxaua iuasaaki, ininiā Teoso omanākarauata amaerekani xika. Iposope amisiritiko.

⁴Iuaritika Teoso iteene amonĩkaua. Kaamonĩkareri Teoso atoko inakari !auari. Iua iteene tirtetaua. Ate maerekati kamakani atxaua,

uaritika itiretaua. ⁵Ipīkani atoko anakasaaki, maerekatinoka akamakasaaki, iuasaaki itxīkitakaua auāki anini, Kristo auāki inīkitakini atoko. Iuasaaki imakatzakari amaerekani, kotxi inirekari ikinipoko erekari isikiniua. ⁶Ininiā Teoso ōkitikaua ipīkani sauaki aāuakasaaki, Kristo ōkitikini atokokana. Ininiā itixineē Teoso takaua ate aītopākini Kristo Xesosikata, kotxi iua nakitiakori atxaua. ⁷Ininiā katanarako ātipirika inirekari oerekiniri ikinipoko erekari atemoni. Erekari isikakiti !ixipoka. !Kamapotōkireri. Kona erekaua, uaritika iteene itiretaua, kotxi Xesosi Kristo nakitiakori atxaua. ⁸Atemoni erekari isikakitinokara makatzakari amaerekani, isākire aāuikasaaki. Ininiā !aposota ateka maerekani amakatzakini, kotxi maerekati kamakani atxaua. Teoso sikakitinokara makatzakari amaerekani. ⁹Akamakiti erekari !iposotari amaerekani imakatzakini. Ininiā kākiti iuikiniua !auari. Teosonokara posotari imakatzakiniri kākiti maerekani. ¹⁰Peerekari Teoso parīka aākixinireē, kotxi ikamaua ate ereka anini. Ininiā Xesosi Kristo nakitiakori atxaua. Ikara iparīka amaneri. Ikamaua ate amaneri anini, erekari akamini īkapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Ātika Nirimanetxi

¹¹Xoteo minakaniua hītxaua, kotxi ikara atoko hīponaniā. Teoso takaōtxikare auaitotakini takauākatai hīte: “Teoso takaōtxikare mauaitotakini.” Xoteoakori auari ikara Teoso takaōtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹²Hīxinikariko mitxi, Kristo sākire hāuikini apisa, Kristo !auari hītemoni. Iuasaaki maparakini atoko hītxaua. Isaeokini !hītxaua. Ātiāo hītxaua. Ikara xika kona hīte posotari hāpakapiniri Teoso sikaenetakiti iuasaaki. Iuasaaki !himarotari Xesosi makatzakiniri himaerekani. Iuasaaki !himarotari Teoso.

¹³Uatxa Kristo Xesosi apakapapekai hīte. Mitxi itakoxiti auakani atoko hītxaua, uaritika uatxa iua minai hīte Teosomoni, kotxi Kristo arēka xiketa hīte īkapani.

¹⁴Iuanokara kamaerekaxiniretaua, ininiā ixipokari Xoteo, Xoteo minakaniua pakini omanatakakiniua. Ikara omanākaretxi paretxi atoko itxa. !Auiritari Xoteo sini Xoteo minakonimoni. Uatxa ātika nirimanetxi atxaua. ¹⁵Kristo ipīkasaaki, ixipokari ikara omanākaretxi, kotxi iuasaaki ikamari ikinika paniātakori iōkatsopatakori ikinimane īkapani. Ikara Xoteoakorimoni sikakori. !Isikaāka Xoteo

minakonimoni. Ininiã Kristo ipíkasaaki, itxíkitakana Xoteoakori, Xoteo minakanuia pakini átika kákiti amaneri atoko inini. Neenamtxi !lauaika, kotxi Kristo kamaerekaxiniretaua amakinika. ¹⁶Ipina aamina ipiriãmitakari nopini, ininiã iusaaki iuaíkana iminana Xoteoakori, Xoteo minakanuia pakini Teosomoni. Átika nirimanetxi atoko iminana Teosomoni. Iusaaki ixipokari Xoteoakori, Xoteo minakanuia omanatakiniua. ¹⁷Xesosi apoka íkorapokoriti Teoso iokanapirena erekari isãpiretiniri kákiti. Isãpiretari kákiti, Teoso omanatiniri kákiti imaerekani xika xipope, Xesosi sãkire auikasaakina. Isãpiretai híte Xoteo minakanuia. Apaka isãpiretari Xoteoakori. Mitxi ôtadoxiti auakani atoko hítxaua, kotxi iusaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸Erekari Matamatakoti átinoka aua. Kristo sãkire aãuikasaaki, iua Erekari Matamatakoti anikaua aïri Teosomoni. Anikari Xoteoakori, Xoteo minakanuia pakini iuamoni.

Teoso Aapoko Atxaua

¹⁹Uatxa Teoso mimarotakani !hítxaikaua. Uatxa áti uãka !hítxaikaua. Teoso tixine auakani hítxaua, apanakini Teoso sãkire auiãkanikata. Iua aapoko auakani hítxaua.

²⁰Teoso aapoko atoko atxaua. Aapokotxi kamaãka kaikori nopini imirikakani íkapani. Xesosi moianariakori tosi pakini, iua iokanatakini kãkitimoni, ninoa sãpiretakiti iua kaikori atoko itxa. Kitxakapiríka Teoso sãkire sãpiretakani sãpiretakiti apaka iua kaikori atoko itxa. Aapokotxi aua átika kai mitari, apanakini kai soro maĩkakari. Xesosi Kristo iua kai mitari atoko itxa. ²¹Ininiã iua maĩkaua. Iuakata aãua, ininiã kákiti itoãpotari auikiniri Xesosi sãkire. Apiananiri aapoko aneãpotini atoko itxa. Iua Apiananiri aapoko atoko atxa. Imisãkiretiko aikoti atoko atxa. ²²Ininiã iua apotiitai híte hĩkinika iua aapoko hininiua íkapani, kotxi Teoso auiniãtaã hítxaua. Erekari Matamatakoti auiniãtaã hítxaua apaka.

Paoro Sãpiretari Teoso Sãkire Xoteo Minakonimoni

3 ¹Ikara atoko ininiã, nota Paoro kateia áki naua, híte Xoteo minakanuia Xesosi Kristo sãkire nisãpiretini xika. Kateia áki naua, kotxi nauikari Xesosi sãkire.

²Híkenakopiretapekari paríkatxi Teoso sikakiti notamoni, isãkire Xoteo minakanuia nisãpiretini íkapani. Ikinipoko erekari

isika notamoni, hīte nisāpiretini īkapani. ³Teoso oerekepekano kākiti mitxi mimarotakiniti. Mitxi axapitiki ikara Teoso oerekakiti niōkatsopatapeka hītemoni. ⁴Uatxa ia hātatsopatakasaaki, hīposotari himarotiniri nimarotakiti, kākiti mitxi mimarotakiniti, Kristo parīka kākiti īkapani. ⁵Kitxakapirīka kākiti kona imarotari ikara Kristo parīka kākiti īkapani. Uatxa Erekarī Matamatakoti oerekari ikara Xesosi iokanatakinimoni. Apaka oerekari ikara Teoso sākire sāpiretanimoni. Teoso parīkanoka ikamana ninoa. ⁶Nisāpiretai hīte kākiti mitxi mimarotakiniti. Xoteo minakaniua apakapariko Teoso nīkatakiti itixineē, Xoteoakori apakapiniri atokotxikana. Xoteo minakaniua, Xoteoakorikata Kristo īto atoko itxauana. Xoteo minakaniua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sāpiretari kākiti isikaenetakiti, kotxi isikari Kristo, Xoteoakori maerekani, Xoteo minakaniua maerekani apaka imaktxakini īkapani. Ikara kākiti mitxi mimarotakiniti.

⁷Teoso iokanatano nota kākitimoni iua iokanapirena erekari nisāpiretini īkapani. Ikara parīkatxi isikano, kotxi ikinipoko erekari Teoso sikano nota iposotiireē. ⁸Itomaneri Teoso nakitiakori poiāorini, iuaritika nota poiāori nininiua atoko inakari !uari. Iuaritika Teoso sikano ikinipoko erekari, kotxi iokanatano Xoteo minakonimoni erekari Kristo auakiti nisāpiretinina īkapani. Ikara erekari !ixipoka. Itori. !Kimarotikori ikinipoko erekari Kristo auakiti. ⁹Apaka Teoso nirekari noerekiniri ikinimane, ikara mitxi imimarotakiniti, Teoso nakitiakori tiretakakiniua. Itixi kamikosaaki, Teoso kipatari ikara kākiti mimarotakiniti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki !uari. ¹⁰Uatxa Teoso nirekari imereēkini oerekiniri ikinipoko Teoso imarore auītetxiakori matamatakonimoni, Teoso tixine auakanimoni. ¹¹Itixi kamiko apisapanika, ātipirika Teoso nirekari aāuīte Kristo Xesosi kaminiri ikinika inirekakiti kākiti īkapani. ¹²Kristo kamakiti ate īkapani aāuikiniā, aposotapitikari aāpokini Teosomoni, ininiā !kapīkareua Teosomoni aāpokini. Ataparaxiniriritika asari iuamoni. ¹³Ininiākara nōtākikai hīte. !Himatinaniuatape nimisiritiko xika. Nimisiritaāka hīte īkapani, Xesosi sākire hāuikini īkapani, ininiā hūiukariko nimisiritiko. Teoso auiritari nimisiritiko, kotxi iua itene tiretai hīte.

Iuaĩkana Paoro Misākiretiniri Teoso

¹⁴Teoso nirekakiti kākiti ĩkapani nixinikasaaki, nikapotoreēkaua aãũite Xesosi Kristo iri apisatoõ, nimisākiretiniri ĩkapani.

¹⁵Ikinimane Teoso nakitiakori, itixine auakani, apaka ikinimane ĩkorapokoriti auakani apakapari iua uãka. ¹⁶Ia atoko nimisākiretari Teoso hĩte ĩkapani: “Peerekai pite. Ikinipoko erekari aua pitemoni. !Ixipoka ikara erekari. Ininiãkara, pisikaposotiiretana Épeso auakani ãkixinire. Ninirekari Erekari Matamatakoti iteene sikataparatinina ninoa ãkixinire. ¹⁷Ninirekari iteene auikinirina Kristo sãkire, ininiã Kristo auapika ãkixinireẽna. Ninirekari ninoa iteene imarotiniri pite tiraõki. Takari kotsa kipatxi erekari ãki auini atokokana, ninirekari ninoa kaikotini pitekata pitiraõki sikataparatinina ĩkapani. Imarotiniãrina pitiraõki, !irikana. !Ikamarina maerekati. ¹⁸Ninirekari ninoa, pinakitiakori, apanakini pinakitiakori pakini, imarotiniri Kristo tiraõki kākiti ĩkapani, kotxi Kristo tiraõki !ixipoka. !Kaiãotikori iua tiraõki. ¹⁹Kākiti kona posotari imarotiniri ikinika Kristo tiraõki. Ninirekari ninoa Épeso auakani apakapiniri ikini sereti erekari pisikakiti ãkixinireẽna, pite atão imarotinina ĩkapani.” Ikara atoko nimisākiretari Teoso hĩte ĩkapani.

²⁰Ininiã uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti !auari, ininiã ikinika aamanaãkiti, ikinika axinikakiti pakini, iposota ikamini. Ari, apikomoni iposota ikamini ate ĩkapani. Axinikakiti, aamanaãkiti poiãoka. Apiata iposotiire. Iua posotiire parĩkauata aãkixinireẽ. ²¹Ininiã Teoso mereẽkini kitxakapirĩka auakani, uatxa auakani, katana auakani pakini ãtipirika txariko Teoso: “Peerekai pite. Apiananiri pitxaua.” Ikara atoko itxana, kotxi Xesosi Kristo makatxakari amaerekani Teoso anaakori aniniua ĩkapani. Ameẽ.

Xesosi Auiãkani ãtika Iĩto Atoko Itxauana

4 ¹Kateia ãki naua, kotxi nauikari Apiananiri sãkire. Ininiã nota iteene õtãkikai hĩte ikinĩõtika atão hĩkamini, kotxi Teoso akiritai hĩte iua anaakori hininiua ĩkapani. Ikara atoko hininiã, iua kamakiti atokokana hĩkamako. ²Ininiãkara !hũikapeua. !Hinirekapiri hinirekakitinoka hĩkamini. Hãuiritariko ãti kaminiri iua nirekakiti. Katima homanãkarauataka !hĩtxapeko. Himĩteenekakakauako hĩkerokasaakiri hĩkamakiti. Hĩtiretakakauako. ³Erekari Matamatakoti

txíkitakari axinikakiti, anireēkiti pakini ātinoka inini, kotxi iua kamaerekaxiniretaua. Ininiākara hīparīkauatako ikara atoko auini īkapani. ⁴Xesosi īto atoko atxaua. Ātika īto, ininiā ītotxi ātika atoko atxaua. Erekarī Matamatakoti ātinoka aua. Teoso akiritakasaakii inakitiakori hininiua, hiātapariko hāpokini iua tixine iuakata hāuini īkapani. Ininiā ātinoka hiātapakiti. ⁵Ātinokara Apiananiri aua. Ātinokara aāuiākiti sākiretxiti aua. Ātinokara apatxisatiko. ⁶Ātika Teoso aua. Iua ikinimane iri ātika aua. Iua ikinimane apisatoō apiatakari itxaua. Ikini itixiti iua aua. Amakinika aākixinireē iua aua.

Teoso Sikakiti Atemoni

⁷Kristo sikapekari iposotiire ate amakinimoni iparīka akamini īkapani. Iposotiire isikaua aparīka akamini īkapani. Aparīka pamimari, ininiā apiata isika iposotiire atemoni. ⁸Kotxi Teoso sākire kitxakapirīka txari:

Ikanīkasaaki itixinemoni, imikanapiriāna kākiti mitxi imokaiakari maīkakini. Iuasaaki isikari erekari kākitimoni.

⁹Iua kanīka, kotxi mitxipe iua katxaka itixi patapixiti ipīkani auiniātaā. ¹⁰Iua itixi patapixiti katxakakari, iuatxikana kanīka iaxiti apiko nopinixiti, ininiā uatxa iua aua ikini itixiti, iaxiti, Teoso tixine pakini. !Auari iua mauakaniātaā.

¹¹Iposotiire isikasaaki isākire auīākanimoni, isikari ia atoko parīkauatakani ininiuana īkapani: Kristo iokanatakini kākitimoni, Teoso sākire sāpiretakani, Teoso iokanapirena erekari sāpiretakani, Teoso nakitiakori ōtākikakani, Teoso sākire oerekakani pakini isikaua. ¹²Ikara atoko isikaua, kotxi inirekari ninoa oerekiniua inakitiakori iparīka atāo akamini īkapani. Ikara atoko isikaua, kotxi ninoa sikataparaxiniretaua. ¹³Ninoa sikataparaxiniretiniritika ātika aāuiākiti auako. Ipinimoni inakari aāuiākiti !auaika, kotxi atāo aimarotariko Teoso ākiri sākire. Ininiā kīkīteua, kimaroreua iuasaaki. Kristo atoko atxauako, kotxi paimatireri iua.

¹⁴Ininiā iuasaaki amarini atoko !atxaikaua, kotxi amarini !imarotari atāo inakari. Tsakati anikakiti atoko, ītima anikakiti atoko itxana kākiti kamisirienereri sākire auīākani. !Imarotarina atāo Teoso sākire. Ninoa kamisirienereri xinikaxitita atāo minakati oerekini īkapani. ¹⁵Atāo inakaranoka asāpiretako kākiti atiraōkiritika. Ikara atoko akaminiā, aimarore aneeāpota. Kristo sākire iteene aūikaāpota. Erekarī akamakiti aneeāpota. Ininiā

Kristo atoko atxaua, kotxi iua ito atokotxikana atxaua. Ate kii atoko itxaua Kristo. ¹⁶Itotxi kamari ikii paniätakiti. Iua atokokana ate kamari Kristo paniätakiti. Ininiã aãpotiitaua. Amoianatakakaua Kristo parîka akamini îkapani, kotxi itotxi âtika atoko atxaua. Kristo sikataparataua amoianatakakiniua. Ininiã ikinika Kristo nakitiakori atão parîkauatiniã iua îkapani, apiaãpota aimarotari iua imarore atão akamini îkapani. Akinika atão aparîkauatiniã Kristo îkapani, ikamataparaxiniretaua. Iuusaaki atiretakakaua. Iuusaaki itotxi erekari, mamianatakati atoko itxaua Kristo nakitiakori.

Aãuini Amaneri

¹⁷Ikara atoko ininiã, ia nisãpiretai. Apiananiri imaroreẽ iteene nõtãkikai. !Hîkamapinikariko apanakini Xoteo minakanuia kamakiti atoko. !Kiîkiteri ninoa kamakiti. !Kiîkiteri ixinikakitina. ¹⁸!Imarotarina atão inakari. Mapiãri atoko itxa iîkitena. Ikara atoko ininiã, !kimarorena. Teoso !itxîkitakana auapininiika ininina, kotxi âkixinireẽna !nirekarina atão inakari imarotinina. ¹⁹Ninoa âkixinire âpatapeka, ininiã !ipêtauatana maerekati ikamakasaakina. Ininiãkara ninoaka sikaua Satanasimoni iïtona nireëkitinoka ikaminina îkapani. Ininiã ikamarina ikinika maerekati. Itori maerekati inireka ikaminina. !Nirekarina iotokakinirina ikara maerekati ikaminina.

²⁰Hîtepekana, ikara maerekati !hõerekaãka, Kristo himarotakasaaki. ²¹Iuusaaki hîkenakotapitikari iua sãkire. Iua oerekai atão inakari, kotxi Xesosi imarotari ikinipoko atão inakari. ²²Hõerekaãka hîtakanapiniri maerekati mitxi hîkamakiti, hîxinikakiti pakini. Himãka kitxakari hõkini atokokana hîtxapaniko himaerekani hîtakanapini. Hîtakanapariko ikara kitxakari hinireëkiti, kotxi ikara maerekati hinireëkiti misirienetai. ²³Ininiã eereka hamanaãriko Teoso txîkitakiniri hîxinikakiti, hinireëkiti pakini amaneri inini. ²⁴Ininiã himãka amaneri hîeretakini atokokana, amanerinoka atão inakarinoka hîkamako, kotxi Teoso txîkitakai hîxinire amaneri inini, Teoso atoko hinini îkapani. Ininiã atão inakari himarota. Erekarinoka hîkama. Teoso îkapaninanira hîparîkauatako.

²⁵Ininiã aãpirena kona hîkamape hîtariakorimoni. Atão inakarinoka hîsãkiretako, kotxi amakinika ate âtika itotxi atoko atxaua. ²⁶Hinaiatakasaakiua, !hãuiritapiri homanãkare txîkitakinii maerekati hîkamini. Himakini apisapanika, hîotokakariko homanãkarauatini. ²⁷Ikara homanãkare himatakanapanisaaki,

hãuiritari Satanasi txĩkitakinii maerekati hĩkamini, ininiã !hãuiritapiriko iua.

²⁸Atxiiti hiitiriuatapeka, ininiã !hiitiriuatapinikako. Hĩparĩkauatako. Erekarĩ parĩkatxi hũuakoã hĩkamako, hĩparĩka ĩki hãpakapini ĩkapani. Ininiã eereka aua minakati hĩtemoni, kãkiti minakati mauinakinimoni hĩsikini ĩkapani. ²⁹Maerekati sãkiretxiti !hĩsãpiretapiri kãkiti. Erekarinoka hĩsãpiretako, hĩsãkire kenakotakani hĩsikataraxiniretini ĩkapani, ikinipoko erekari Teoso sikakiti ninoa apakapini ĩkapani. ³⁰Kona hĩkamamatinanitapiri Erekarĩ Matamatakoti Teoso nakiti himaerekani xika. Erekarĩ Matamatakoti Teoso takaõtxikare itxaua. Teoso sikapekari iua atemoni, ininiã aimarotapitikari aãpakapiniri ikinipoko Teoso sikaenetakiti Kristo uai kanapiriãkasaaki. Iuasaaki imakatzakaua ikinika maerekati auiniãtaã. ³¹!Hinĩkatapiri homanãkare hãkixinireẽ. Katima naiataka !hĩtxapeko. Ātipirika apanakini homanatinini, hĩtakanapako. !Hĩtxitapiri āti. !Himĩsãkirepiretapiri āti. Ikini sereti maerekati ikara atoko inakari hĩtakanapako. ³²Erekarĩ hĩkaminakakauako. Hiamonĩkakauako. Himaxinĩkaretariko maerekati āti kamakiti hĩtemoni, maerekati ate kamakiti Teoso maxinĩkaretini atokotxikana. Teoso maxinĩkaretari amaerekani, kotxi Kristo ipina ate ĩkapani.

Hĩtiraõkiuatako Ikiniõtika

5 ¹Teoso anaakori itiretakini hĩtxaua, ininiã hĩkamariko Teoso kamakiti atokotxikana. ²Hĩtiraõkiuatako ikiniõtika, Kristo tiretiniua atokotxikana. Iuaka isikaua Teosomoni, kotxi ipina ate ĩkapani. Teoso apokaerekatari Kristo ipinini ate ĩkapani. Peerekari isikiniua Teosomoni.

³Teoso nakitiakori hĩtxaua, ininiã kona ninirekari nikenakopiretiniri pĩtaniri minakotikatika, pĩtanoro minakotokatika pisirĩkini. !Apakata maerekati hiĩto nireẽkiti hĩkamini. !Apakata maerekati hiĩto nireẽkiti hĩxinikini, hĩsãpiretini. Ikara hĩxinire txikotakari hĩtakanapako. Txineiro potxitakani !hĩtxapeuako. ⁴!Hĩsãpiretapiriko sãkiretxi maerekati. Sãkiretxi miĩkiteti apaka !hĩsãpiretape. !Hinapetapiri āti. Hĩsãkirauatakasaaki, hĩtxariko: “Peerekari Teoso, kotxi isikaua ikinipoko erekari.” ⁵Aimarotari ia: Ītanoro minakotokatika sirĩkakari, maerekati iĩto nireẽkiti kamakari, txineiro potxitakani pakini liteosonetari Teoso. Teoso kamakori misãkiretakani atoko itxana. Ikara atoko inakani !apakapari Teoso

sikaenetakiti iua anaakorimoni, Kristo, Teoso pakini auítetxi ininiãtaãua.

⁶Kona hãuiritapiri kãkiti misirienetini hĩte miĩkiteti sãkirextitiã. Kona !hãuikapiri ninoa sãkire, kotxi ikara atoko inakari maerekati xika, Teoso misiritariko isãkire makĩpitakani. ⁷Ininiã ikara atoko inakani moianariakori !hĩtxapeuako.

Pokamara Atoko Hĩtxaua

⁸Mĩtxi hĩte mapiãri atoko hĩtxa, kotxi !himarotari Apiananiri iuasaaki. Uatxa hĩte imarotapitikari iua, ininiã pokamara atoko hĩtxaua. Ininiãkara erekarinoka hĩkamako ikiniõtika. ⁹Erekari Matamatakoti auakasaaki kãkiti ãkixinireẽ, erekarinoka inireka ikamini. Atãonoka ikama. Atão inakaranoka isãpireta. Ikara atoko inakari Erekari Matamatakoti sikakiti. ¹⁰Hinitariko Apiananiri nireẽkiti hĩkamini ĩkapani. ¹¹Ikara atoko ininiã, kona himoianatapiri kãkiti maerekati kamakani, kotxi ikara parĩkatxi ipiaã potoricakari. Ikara atoko inakari parĩkatxi !iminari erekari atemoni. Ininiã maerekati !hĩkamape. Ia hĩkamako. Hõerekariko kãkiti maerekati makamakani. ¹²Apẽtauata asãpiretiniri Teoso sãkire makĩpitakani kamakiti ipiaã, kotxi apia maerekati ĩkora. ¹³Ikinika tirikapĩ kamara auiniãtaã atamataãka, ¹⁴kotxi tirikapĩ iopinikari ikinika. Ininiã ãti txari: “Himereka, imakakani atoko inakanii. Hõkitikauako ipĩkani atoko inakanii. Ininiã iuasaaki Kristo iopinikariko hãkixinire.”

Miĩkiteti !Hĩtxapeua

¹⁵Erepaniko. Atão inakari hĩkamako ikiniõtika. !Hĩkamapiri miĩkiteti kamakiti atoko. Hĩkamariko kãkiti kiĩkiteri kamakiti atoko. ¹⁶Hĩkamariko erekari, kotxi poiãonoka hãuini. Hĩkamariko erekari ikiniõtika, kotxi maerekati auapitika ĩkorasaaki. ¹⁷Ininiã miĩkiteti !hĩtxapeua. Himarotariko Apiananiri nireẽkiti.

¹⁸Kona hiãtapero iãriã kapoãro hĩpoãtini ĩkapani, kotxi itxĩkitakai maerekati hĩkamini. Hãuiritariko Erekari Matamatakoti txĩkitakinii erekarinoka hĩkamini. ¹⁹Hĩsãpiretakakaua xikari Teoso ĩkapani, xikari kitxakari, xikari ĩkorapokoriti auakari pakini. Hĩxikaretari ikara atoko inakari xikari Teoso ĩkapani. Hãkixinireẽ apaka hĩxikarauata Teoso ĩkapani. ²⁰Ãtipirika hĩtxariko aĩri Teoso: “Erekapitikai pite, kotxi erekari ikinipoko pisikakiti atemoni.” Xesosi Kristo aãũite ininiua, asãpiretari Teoso ikara atoko inakari.

Tanorotxi Pirena.

²¹Hĩpaxitakakauako, āti nirekakiti hĩkamini, kotxi hĩpĩkariko Teoso manirekakiniti hĩkamini. ²²Ininiã hĩte sitoakoro hĩkamariko hĩtaniri nireẽkiti. Apiananiri nireẽkiti hĩkamini atokokana hĩkamariko hĩtaniri nireẽkiti, ²³kotxi pĩtāniri pikii atoko itxaua. Ininiã iua piauĩte itxaua. Iua atokokana Kristo inakitiakori kii atoko itxaua Kristo. Iua ĩto atoko atxaua. Aãũite itxaua. Amaerekani makatxakakari itxaua. Ininiã sito kamariko oĩtaniri paniātakiti. ²⁴Ininiã kākiti Kristo nakitiakori kamari Kristo nireẽkiti. Iua atokotxikana sito kamariko ikinipoko oĩtaniri nireẽkiti.

Taniritxi Pirena

²⁵Hĩte taniritxi, hĩtiretaroko hĩtanoro. Kristo tiritinina inakitiakori atokokana, hĩtiretaroko hĩtanoro. Iua iteene tirtana, kotxi ipina inakitiakori ĩkapani. ²⁶Iua ipina, kotxi inirekari itxĩkitakinia ate iua nakitiakori aninia. Inirekari imakatxakiniri amaerekani. Āparaã makatxakiniri aĩto txiko atokokana, iua sākire makatxakari amaerekani aākixinireẽ auakari. ²⁷Kristo ipina inakitiakori ĩkapani, kotxi inirekaua iposope anini ate apakapini ĩkapani. Iuasaaki peerekaua. Ātika amaerekani !auaika. Ātika akerokakiti !auaika. Ikara atoko inakari maerekati !auaika. Iuasaaki atão Teoso nakitiakori atxaua. Erekarinoka akama iuasaaki. ²⁸Ikara atoko ininiã, kiki tirtetaroko ĩtanoro, ĩto itiretini atokokana. ĩtanoro tirtetakari iuaka itiretaua. ²⁹Kākiti !omanatari iuaka ĩto. Isikakienatari. Itiretari. Apiananiri tiritiniri inakitiakori atokokana, kākiti tirtetari iuaka ĩto. ³⁰Apiananiri ĩto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxaãpota. ³¹Iua ĩto atoko atxaua, ininiãkara kiki ĩtanorouatakasaaki, itakanapana iri, inoro pakini ĩtanorokata ikaikotini ĩkapani. Ininiã ātinoka ĩtotxi atoko itxauana. ³²Nisāpiretai mitxi !kimarotikori. Kristo inakitiakorikata ātika ĩtotxi atoko itxauana. Kākiti !imarotari ikara mitxi. ³³Ininiã pitiretaroko pĩtānoro piteka ĩto pitiretini atokokana. Pite tanorotxipekana, pipaxitariko pĩtaniri.

Amarini Pirena

6 ¹Hĩte amariniakori, hĩkĩpitanako hĩri, hinoro pakini sãkire, kotxi ikara Apiananiri paniãtakiti. Atão pikĩpitanako ninoa sãkire. ²Kitxakapirĩka Teoso sãkire paniãtaua:

Hĩpaxitanako hĩri, hinoro pakini.

Ikara Teoso paniãtakiti hĩkaminiã, Teoso sikaenetakiti isika hĩtemoni. Mĩtxi Teoso paniãtakiti !auari Teoso sikaenetakiti.

³Hĩri, hinoro pakini sãkire hĩkĩpitiniã, ia isikaenetakiti apokapitikako hĩtemoni. Hĩkĩpitiniãri ninoa sãkire, erekari hãuini. Hĩkĩpitiniãri ninoa sãkire, hãuiniritika kiomãtxi hĩtxauako.

Irĩtxi Pirena

⁴Hĩtepekana irĩtxiakori, kona hĩtxĩkitakapena hamariteakori omanãkarauatini atão minakati hĩkamini xika. Hõerekanako Apiananiri nireẽkiti ikaminina. Hõerekanako Apiananiri sãkire imarotinina.

Nitiritxi Pirena

⁵Hĩtepekana nitiritxiakori amotakoni, hĩkamariko hĩauĩteakori ĩkorapokoriti auakani paniãtakiti. Hĩpaxitanako ninoa. Hĩpĩkariko ninoa manirekakiniti hĩkamini. Hãkixinireẽ hinirekariko ninoa nireẽkitinoka hĩkamini. Kristo paniãtakiti hĩkamini atokokana, hĩkamariko ninoa paniãtakiti. ⁶!Hĩparĩkauatapeko hĩparĩka erekari apanakini atamatini ĩkapani ĩkapani, kotxi iusaaki hinirekari ninoa poxokotini. Kristo nitiriakori hĩtxaua, ininiã hĩparĩkauata Teoso nireẽkiti hĩkamini, kotxi hãkixinireẽ ikaranoka hinireka hĩkamini. ⁷Hĩkamariko hĩparĩka ikinika hĩpoxokoniritika, hinirekiniritika. Apiananiri ĩkapani hĩparĩkauatini atokokana, hĩparĩkauatako hĩauĩte ĩkorapokoriti auakari ĩkapani. ⁸Kotxi himarotari Apiananiri sikariko parĩkatxi ĩki kãkitimoni, ikinipoko erekari ikamakiti ĩki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina ĩki.

Patrão Pirena

⁹Hĩtepekana patrão, ia atoko inakari hĩkamako hinitiriakorimoni. !Hĩtxapiri hinitiriakori: “Ikinika nota paniãtakiti himakamakaniã, iteene nimisiritai hĩte,” kotxi hĩte patrãote aua apaka iaxiti. Iua Teoso. Teoso kamakiti poiãorimoni, iua atokotxikana ikamakiti auĩtetximoni.

Kākiti Xinire Tokapare

- ¹⁰Nitariakori, ia nisākire mapotōkire: Katapara hītẓako. Hīkosekataparatariko Apiananiri tapara, kotxi kaposotiireri iua.
- ¹¹Sotato ieretakari iīto tokapare, neenamatchi ikamini apisapanika. Iua atokokana Teoso sikaua axinire tokapare, ininiā maeretakariko ikinika ikara axinire tokapare, kotxi neenamatchi auapitika Satanasikata. Iua paimatireri. Ixinikaxititapekari itxīkitakinia maerekati akamini.
- ¹²!Aneenamauata kākitikata. Aneenamauata maerekani matamatakoni auīteakorikata, ikinika maerekani matamatakoni kaposotiireririkata. Aneenamauata auītetxiakorikata iikorapokoriti ipiaā auakanikata. Aneenamauata ikinipoko maerekani matamatakoni iaxiti auakanikata.
- ¹³Ininiākara hīeretakariko ikinika Teoso sikakiti hīxinire tokapare. Ininiā maerekati apokasaaki, !inokai. Kona hīrika. Kona himiteka. Hīokanitari Satanasi isini. Hīte kāiata.
- ¹⁴Sotato iposope ineenamauatini atoko hītẓako. Sotato takari ipakiomatare. Ipakiomatare maīkari ikinipoko iīto tokapare. Sotato pakiomatare atoko itxa hīxinire tokapare maīkiko. Atāo inakari sākiiretxiti itxaua iua. Ininiā hītakariko ikara hīpakiomatare.
- Sotato takari itorota koana, itorota tokapare iīkapani. Sotato torota koana atoko itxa hīkamakiti atāo inakarinoka. Ininiā hīeretakariko ikara hītorota tokapare.
- ¹⁵Sotato kiti apaka iposope ineenamauatini, kotxi itakari ikiti mata ikiti tokapare iīkapani. Sotato kiti mata atoko itxa Teoso iokanapirena erekari aanikapiretakiti kākitimoni. Ikara iokanapirena sāpiretaua Teoso !imisiritaikaua, isākire aūuikasaaki. Ininiā hīeretakariko ikara hīkiti mata.
- ¹⁶Sotato maīkari itokapare, iīto imokaiakari xiripi minokakani iīkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sākiire auikiko. Iteene hāuikiniāri Teoso sākiire Satanasi liposotari inokinii maerekatiā. Ininiā himaīkariko ikara tokaparetxi.
- ¹⁷Sotato takari ikii tokapare metao kamakori. Sotato kii tāta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiā hītakariko ikara hīkii tāta.
- Sotato anikaro iouata mitaro. Oa iouata mitaro atoko itxa Erekari Matamatakoti sāpiretiniua Teoso sākiire. Ininiā himaīkaroko oa iouata mitaro.

¹⁸Himisākiretariko Teoso ātipirika. Hamanaāriko, Erekarī Matamatakoti nireēkiti iaōka hāpakapini. Araōkire hītxako. !Hītakanapapiri hīsākirauatini Teosokata. Hamanaāriko Teoso, ikinimane inakitiakori nireēkiti isikinina.

¹⁹Himisākiretari Teoso nota īkapani apaka. Hamanaāri Teoso, isākire isikinino nisākirauatakasaaki, nitaparaxinireritika nisākirauatini īkapani, kotxi ninirekari Teoso iokanapirena erekari nisāpiretiniri kākiti. Mitxi Teoso iokanapirena erekari !kimarotikori. ²⁰Uatxa Teoso iokanatano nota kākitimoni, iokanapirena erekari nisāpiretini īkapani. Ikara nisāpiretini xika, kateia āki naua nota uatxa. Hamanaāri Teoso, isākire nitaparaxinireritika nisāpiretini, kotxi ikara inakari niparīka.

²¹Niokanatarī Txíkiko inakori hītemoni. Aītari atiretakiti iua. Apiananiri nitiri itxaua. Atāo iparīkauata Apiananiri īkapani. Iua sāpiretaiko hīte nota pirena. Ikara atoko himarotariko nauini, nikamakiti pakini. Iua sāpiretai ikinipoko nota pirena. ²²Ininiā niokanatarī iua hītemoni ate pirena himarotini īkapani, isikataparaxiniretinii hīte īkapani. ²³Nitariakori, āiri Teoso, Apiananiri Xesosi Kristo pakini kamaerekaxiniretai. Itiretaina hīte. Itxīkitakaina Teoso sākire iteene hāuikini. ²⁴Teoso sikari ikinipoko erekari aāuīte Xesosi Kristo ātipirika tirketanimoni. Ameē.